

丁文誠公奏稿

丁文誠公奏稿

卷之二目錄

商邱等處鹽務改由官運摺

同治六年二月二十五日

出省察看地方情形摺

同治六年二月二十六日

酌議協濟甘省月饟摺

同治六年三月二十日

察看地方事竣巡視黃運河防摺

同治六年三月二十日

布置運防回省趕辦秋審片

同治六年四月初七日

出省辦防改駐開河摺

同治六年五月初三日

捻竄東境力籌防剿摺

同治六年五月十一日

捻渡運河督隊截剿並嚴布黃防摺

同治六年五月十三日

捻蹤竄近省垣督軍扼剿摺

同治六年五月十八日

擒逆東竄省垣安堵督軍追勦摺

同治六年五月二十三日

平度州馬蘭堡大獲勝仗摺

同治六年五月三十日

分段布守黃防片

同日

卽墨連捷設法蹙賊摺

同治六年六月初九日

會築河牆防局未能遽定摺

同治六年六月十八日

修整河牆並北路勦辦梟匪摺

同治六年六月二十九日

擒撲膠河官軍擊退現辦梟匪摺

同治六年七月初五日

協守濰西添營籌勦摺

同治六年七月二十日

擊散江境土匪力籌會勦片

同日

商邱等處鹽務改由官運摺

同治六年十一月二十五日

奏爲東省南運商邱等九州縣鹽務廢弛已久現擬籌借運本督飭委員專辦以顧引岸而重課款恭摺奏祈

聖鑒事案查河南歸德府屬之商邱甯陵睢州永城虞城夏邑柘城鹿邑及衛輝府屬之考城等九州縣向係東省南運引岸銷引七萬八百一十道歷年疲敝已極迭經設法整理迄無成效茲復飭司籌議據署藩司盧定勳兼署運司衛榮光詳稱南運鹽務溯自道光二十九年因商多疲累改爲官商並運咸豐三年以後迭遭寇擾商民失業遂致引積課懸同治元年忠親王僧格林沁糧臺派員試辦專爲濟饒嗣以銷數遲滯又經停止仍歸商辦年來竭

力整飭無如各商積困愈深徧地私鹽充斥難期振作南
運爲北運貼近藩籬商邱等處尤爲南運進私門戶若非
大加整頓不足以振頽起廢商辦雖曲加撫恤課款仍日
見虧短卽另招股商而通綱久視爲畏途招徠亦甚不易
悉心籌畫擬將商邱等九處引岸統歸官辦仍遵照先課
後鹽章程無論正雜捐款一律完繳領引春鹽運至河南
設局派員經理於引背後註定本商姓名使引窩不致泯
滅各該處離場千有餘里水陸轉運維艱必須預籌運本
方可舉辦先由藩運兩庫籌借銀五萬兩飭令承領之員
出具切實保結統限二年埽數歸還如此整頽綱而衛全
局於南北課運均有裨益等情請奏前來

臣

覆查南運商

邱等九處每年額引七萬八百一十道自道光二十九年
起至同治五年止惟咸豐六年分照額全領其餘各年共
計未領引七十九萬五千六百九十三道實爲異常短絀
總由該處界連南北蘆淮兩私分道浸灌而厯年官商並
運未能一氣貫注又兼連年羣捻肆擾節節梗阻以致全
岸倒敗不可收拾同治二年前撫臣譚廷襄奏歸僧格林
沁由糧臺酌籌運本派員試辦以時勢過難議明僅完正
課銀兩雜款一切概行免交並議每包提銀二兩接充軍
餉乃自二年冬季起至四年春季止兩年之間止領同治
二三年引張五萬道仍有未領引九萬一千六百二十道
雖經遵照原議提銀十萬兩歸該糧臺支用而所議應交

正課並未扣除隨引完交仍在藩庫於協解月饌內照數
劃抵雜款則盡屬虛懸是僧營糧臺試辦兩年雖得銀十
萬兩而以正雜各款扣除合算僅得銀六萬餘兩且以兩
年應銷十四萬一千六百二十道之引祇銷出五萬道仍
屬引絀課懸毫無起色嗣以地方寇氛不靖益形壅滯隨
經撫臣閻敬銘奏明停止以同治四年爲始仍歸東省無
論官商悉照先課後鹽章程辦理兩年以來雖屢飭商人
竭力籌辦而商力疲乏加以去年產鹽短絀鹽積運費等
項昂貴數倍從前而蘆私淮私又復日益充斥商人更視
爲畏途雖令勉強承辦口岸仍難整頓臣再四籌維苦無
良策竊謂理財以充裕

國課爲先行鹽以疏通滯岸爲重當此商累引懸祇可通歸官辦力求振作或冀大局稍有裨益查歸德府所屬商邱縣係附郭首邑鹿邑縣係毗連安徽要區該二縣地處適中必須設局經理現擬於商邱縣設立總局鹿邑縣設立分局派委妥員分投查辦其餘何處應設分店再由委員到境後查明稟辦其由場配運處所亦須另委專員經理並發木質關防鈐記以昭信守使之各專責成並由署設立鹽務局總司稽查惟統歸官辦成本無出卽設局應製一切墊底家具並委員人等薪工火食各項爲費甚煩且值此缺鹽之際鹽穰運腳倍形昂貴較之僧營糧臺試辦益形棘手茲擬先由藩運各庫籌借銀五萬兩作爲

運本藉資接濟統限兩年內埽數歸還其領引春鹽悉遵
定章先課後引雜款亦均隨引交納不准分毫蒂欠至每
年應銷引數處分亦照定例辦理惟積弊之後該委員等
創辦維艱如能潔己奉公勤慎將事俾鹽引暢銷應請按
照抽釐之例每屆兩年由臣酌覈分別從優請獎儻有墮
銷亦卽照例參處此外若別有侵蝕營私情弊尤當從嚴
治罪庶各有勸懲俾知感奮至按年照額督銷商邱等州
縣不得辭其責緣行鹽全在禁私私梟充斥必致官引壅
滯南運地方係屬隔省委員到彼試辦人地生疏若非地
方州縣盡力協助必致呼應不靈惟近來地方州縣積習
相沿一經官辦卽自謂無督銷之責意存推諉茲擬明定

章程委員試辦仍歸地方官督銷其查禁私鹽仍應責成實力經理如銷足分數照例甄敘再能拏獲大夥私匪卽行給予優獎儻因東省官辦意存膜視以致墮銷則例定處分具在必當執法以繩不稍寬假若聽私販入境不卽查辦卽當照徇庇例隨時從嚴參辦應請

旨敕下河南撫臣申明例禁嚴飭各顧考成切勿輕爲嘗試再南運各屬向來掣配永阜場鹽該場因上年黃水過旺納潮時與海水夾雜兼以秋雨連縣滷氣不升產鹽短絀而配運各地引票最多深慮不敷春運是以前經奏明借運蘆鹽並由本省各場酌量融借惟黃水漫溢非一時所能猝防永阜場以後產鹽能否暢旺實不可知而借運

終非常局現復酌籌灘本飭令永利場陸續開築新灘趕
緊興曬以顧大局將來南運春鹽擬將引張改由永阜永
利兩場隨時酌量配運庶可源源接濟至由場築鹽以及
護運秤驗各事宜概照向章辦理並分飭場所各官及委
員等隨時稽察嚴絕弊端其由場運赴歸德水陸迭更所
有沿途偷漏灑賣夾私等弊仍飭一體嚴查有犯卽行懲
辦南運各商均係世業納課多年應仍留本商姓名並不
革除俟辦理數年後察看引岸衰旺商本優絀情形再行
酌辦刻下該商等如願由局販買轉賣亦聽其便第此事
歸官試辦一切規模均屬創立兼以屢興屢廢之區亟圖
整理能否無誤課款實未能確有把握惟以地方應辦事

宜亦祇期竭心力冀收得尺得寸之效現議銷售鹽包除正雜課款概行完繳及扣除成本並開銷一切局用薪工火食器用各項外但得稍有贏餘卽儘數充饒務令涓滴歸公俾濟實用此外如有應行變通之處容臣隨時酌量奏咨除咨部查照外理合恭摺具奏伏乞

皇太后

皇上聖鑒訓示謹

奏

出省察看地方情形摺

同治六年二月二十六日

奏爲恭報

微臣

出省由武定臨清東昌一帶前赴東平行

營察看地方情形並督辦黃運河防恭摺仰祈

聖鑒事竊

臣

於去歲十二月內在東平行營以出省恩遽

署中一切未及清釐

大計展限亦已屆期值此賊蹤較遠必須乘時趕辦曾經
奏明回省辦理在案茲自回省後趕緊將

大計事宜督同藩臬兩司詳慎查辦業經完竣並將省中
一應公事部署稍定連日接據各路探報捻逆任賴股匪
現復由湖北廣濟黃梅竄入皖境潛山太湖並分股擾及
英山一路等情該逆飄忽異常將來非由光山固始竄豫

必由六安州一帶竄擾潁毫尋路東奔臣已飛飭東路沿
運滕嶧各州縣確探嚴防而駐防黃運各營亦須親往督
查操練並巡歷河牆以免日久生懈惟查武定府屬及臨
清東昌等處與直隸海口在在毗連恆慮私梟馬賊藏匿
雖經嚴飭各該州縣隨時查拏懲辦猶恐視爲故常臣擬
乘此賊蹤尙遠之時定於本月二十七日由省親帶辦理
營務各員輕騎減從先從武定臨清東昌各路沿邊周歷
巡查藉以考核各州縣政事之勤惰俾共知儆惕認真振
作以靖地方到東昌後卽由張秋渡河前赴運防駐紮東
平查看各營兵勇人數技藝並河牆應否添補先事預籌
完固用期周密其一切地方軍務各情形容當隨時奏祈

聖鑒至臣 出省後所有署中日行事件暨解審命盜等案
卽委署藩司代行代勘緊要事件仍由臣 行次辦理謹將
微臣 出省日期恭摺由驛具奏伏乞

皇太后

皇上聖鑒訓示謹

奏

酌議協濟甘省月餽摺

同治六年三月二十日

奏爲遵

旨酌議撥解甘餽謹將東省出入款項及現在應協各處餽數情形酌量通籌擬定實數據實具陳仰祈

聖鑒事竊

臣於本年二月十三日承准軍機處字寄同治

六年二月十一日奉

上諭茲據左宗棠奏稱欠解甘餽各省督撫亦有難於兼顧者請飭就各省情形擬定實數各等語甘省餽項支絀必得各省協濟第軍務未平派解較多各省亦難兼顧莫如由該省督撫就各省情形酌定數目按月報解較有實濟著酌量情形每月究能撥解若干據實具奏各等因欽

此仰見

聖慮周詳體念籌餉之艱仍寓核實之意伏讀之下欽佩
莫名臣竊維計餉之出必以歲入之盈絀爲程而撥餉之
數必以所需之緩急爲定茲計東省歲入惟有地丁一項
額徵三百二十餘萬除分解坐支外實計司庫歲收二百
六十萬有奇加以連年黃水漫溢捻逆紛擾除去災緩約
五十餘萬年中儘力催解不能過二百十餘萬之數舍此
別無他入之項此歲入之實數也而歲出之款則本省防
河兵勇口糧及製造軍火各用每歲約計一百六十餘萬
又本省綠營兵餉及青德二州滿營兵餉米折酌減支發
約計每歲亦需三十餘萬其協撥最急之項則奉撥京餉

三十萬固本軍饗六萬次則協解督臣李鴻章藩司潘鼎新之月饗共計每歲六十萬是皆分毫不能短少時刻不能拖延而核之司庫入款已短至八十餘萬之多此外各處協饗如奉省新疆陝甘陝西清淮安徽甯夏慶陽各月饗及新疆烏魯木齊伊犁各處經費協饗每歲合計尙有二百數十餘萬雖部撥頻仍司庫中實無實項可指然念時局艱難亦不能不挪東補西急資共濟如奉省陝甘陝西清淮慶陽安徽及新疆伊犁等處臣於每歲量力度時無拘多寡亦必勉爲籌撥斷不敢稍存膜視無如東省入項無他每當委員守催籌措之窘寢食俱廢極冀捻患可除庶以本省裁兵之費爲鄰邦協濟之需茲捻氛尙熾奔

突靡常東省爲畿輔屏蔽黃運河防刻難稍懈而去冬又將淮軍認守濟甯一段防地撥歸東防因饟源無出未敢增兵現又選練黑龍江馬隊冀資遠勦是本省兵勇月饟萬難稍裁茲因左宗棠之奏仰荷

聖慈諭

臣

等酌量情形據實具陳

臣

謹將司庫出入及各

省協饟數目通盤核計所出實數倍於所入挹注殊難措手惟陝甘軍情緊要左宗棠督辦軍務實西陲全局攸關若不力任饟糈何資呼助然勉強多認將來無從設措

臣

與藩司再四籌商擬於無可籌畫之中每月力籌一萬二千兩解交行營以濟急需

臣

惟有督飭藩司極力措解冀資接濟至各處協饟但使力有可圖

臣

亦必盡力勻撥以

期仰副

宸廑所有酌量東省情形籌解左宗棠營餉數目情由謹
恭摺實陳由驛具奏伏乞

皇太后

皇上聖鑒訓示遵行謹

奏

查看地方事竣巡視黃運河防摺

同治六年三月二十日

奏爲查看武定臨清東昌一帶地方情形並巡視黃運河防回駐東平恭摺仰祈

聖鑒事竊

臣

前將出省日期由武定臨清東昌一帶前赴

東平行營察看地方情形並督辦黃運河防各情形由驛奏明在案

臣

拜摺後卽於二月二十七日由濟陽齊東經

歷武定取道德州折赴臨清東昌等處察看各府州縣地方民情尙形安靜惟各該府州縣與直境及海口毗連處所前因鹽價昂貴時有私販乘機浸灌迭經各該地方官設法擒捕近亦頗知斂迹

臣

沿途徧加詰誡復嚴飭各州縣不時親帶勇役與派出緝梟各營弁認定地段往來會

哨並購拏著名首匪各州縣尙知奮勉不至視爲故常邊
圉漸期靜謐臣抵東昌後先查河北各防自沙灣至豆腐
店係東省黃防汛地共有要口三道均經東昌府知府龔
易圖妥爲布置尙屬周密現在水勢漸長有險可扼足資
守禦由張秋鎮渡河自沈口至戴廟一帶查驗河道查沈
口河身淤塞前經奏明歸東省防勇挑挖臣於正月初旬
卽飭總兵王心安派勇就所紮汛地盡力挑濬現已一律
寬深並將東西兩岸所積坡水放注涸出民田二十餘里
悉資耕種挑出淤泥卽將河牆加高培厚亦已增修完整
臣巡歷河牆查閱沿運各營兵勇尙屬齊整技藝亦爲熟
習隄牆亦一律完固於三月十四日行抵東平駐紮此臣

出省後查看地方並黃運河防及各營勇之情形也查運
防汛地前經曾國藩奏明自長溝池北歸東軍防守長溝
池南歸淮軍防守嗣李鴻章將濟防各軍調爲游擊自長
溝池南至新店八十餘里已於正月初十日後歸東軍自
防東省防地較前更長百餘里已調在籍提督傅振邦督
兵駐守頗爲周密臣忝膺疆寄於應辦各事不敢稍涉疏
忽現據探報任賴逆匪尙在皖鄂交界往來滋擾臣當趁
此賊蹤稍遠之時務將沿河各營兵勇嚴覈虛實勤加操
練設一旦有警冀於防勦可期得力所有臣出省查看地
方情形並駐紮東平整飭黃運河防各緣由理合由驛具
奏再東省於二月二十七八兩日連得大雨地畝深透閩

省均霑麥田有收秋禾亦均布種堪以上慰

慈懷合併附陳伏乞

皇太后

皇上聖鑒訓示謹

奏

布置運防回省趕辦秋審片

同治六年四月初七日

再臣前將出省查看地方並巡視黃運河防於三月十四日回駐東平各情形恭摺奏報在案臣到東平後復將沿河各營逐加校閱嚴爲釐剔所有未能得力各弁勇酌量裁汰以節糜費並審度地勢就現有兵力騰挪布紮以壯聲勢而資截勦查河北防務現在水闊岸高布守已定無庸他慮惟運防地狹水淺專守牆則賊勢相逼難以測其淺深每遇搶渡撲牆不無驚惶紛擾之勢兼顧兩岸則我營所踞逆蹤難以輒乘且觀變乘機可收近守遠攻之效現於河東沿牆一帶以總兵王心安所帶東治八營勻紮沈口至靳口七十八里一段以總兵陳錫周所帶周字一

營總兵楊飛熊所帶吉勝四營勻紮靳口至開河三十餘里一段自開河至長溝四十里內外重湖河水漸漲賊難偷渡無須設守自長溝至新店八十餘里仍以道員王成謙所帶常武各營暨提督傅振邦所帶青州兵七百名勇丁一營挨段勻紮騰出副將王正起所帶振字七營並抽調總兵姚紹修參將馮義德張青雲副將張得魁莫祖紳守備廖楚勝等所帶七營共十四營扼紮河西自王壩口至開河一帶聯絡分布以爲上下游擊之師查西岸地勢平行逆氛竄撲皆由於此最爲緊要復調總兵趙三元所帶水師舢板礮船一營舢板礮船二營在安山老干碑靳口袁口開河等處擇要分紮與河西隊伍互爲聲援如遇

擊勦卽隨隊上下相機策應以臻完密東省兵力本單專
守河牆或恐日久坐困分布遠勢則聲威較壯賊庶不敢
逼我河干我師亦可隨處雕勦臣再四審度如此層層布
置似較得力現在內外營牆均已完備迭據探報任賴逆
股仍在楚境去東尙遠本年應辦秋審業已屆期其閒應
緩應實臣須與臬司商確會勘期無出入現擬於初九日
回省辦理秋審事件仍飭在防各營將弁勤加訓練不致
稍存怠忽如賊氛稍近臣仍迅赴行營調度一切所有沿
河內外布置情形暨回省勘辦秋審日期謹附片具奏伏
乞

聖鑒訓示謹

奏

出省辦防改駐開河摺

同治六年五月初三日

奏爲任賴股匪現由新野竄入豫疆勢恐北趨擬馳赴防
所由東平改駐開河以便臨敵調度恭摺仰祈

聖鑒事竊臣前於四月初七日在東平營次將暫回省城

商辦秋審事件並沿運東西兩岸布置防守各情形恭摺

奏報在案臣回省後卽將應辦秋審事宜與司道等悉心

會勘刻已辦理蒞事迭接探報任賴逆股半月以來總在

楚豫交界各處往來游弋據逃出難民聲稱該逆由鄂省

就食殆盡屢思東竄以圖搶割麥禾頃又據豫省坐探委

員並藩司潘鼎新稟函據稱鄧州飛報該逆於二十日大

股竄擾湖北襄陽縣屬之雙河地方距鄧州二百餘里二

十二日竄至新野城外大股在城東南十五里邊馬已入鄧州東鄉三十里桑莊等處勢甚兇猛等語查新野鄧州均在豫西距東省尙遠然賊情叵測奔突靡常刻已竄入豫疆儻徑向北趨裕葉襄郟一路均該逆往來熟徑賊馬剽疾數日千里刻下麥苗將熟該逆既有東竄搶麥之說自不得不預爲准備臣擬卽日馳赴防所相機辦理惟查去歲捻逆攻撲河牆均在開河靳口一帶游逞臣前因此地喫重定議抽調王正起等各營出紮西岸預備擊勦期於內外兼顧此次赴防若仍駐東平似覺寫遠現擬改駐開河庶一旦有警已在敵前調度較爲親切抑臣查距南陽鎮十八里之谷亭一帶地方原係湖路當湖水漲發之

際本可無須設防近聞河水乾涸幾同陸地該處係淮軍
認守地段現派有淮軍管帶水師提督徐道奎一營駐守
但恐水勢日涸礮船人力難施若賊竄曹境由此攔入殊
於大局有礙臣興念及此亟思力圖周密第念東省運防
汛地自去冬李鴻章調出潘鼎新張桂芳各軍爲游擊之
師復將長溝以南至新店之八十餘里換歸東防刻計黃
運兩防約共三百餘里地廣兵稀實形單薄因饟需無出
未敢遽議增兵茲若再於南陽鎮以下勉強兼顧雖竭力
籌辦日久恐難支持臣現一面預行布置並專函飛商李
鴻章安速籌議冀臻完密以維大局而顧地方所有臣於
本月初三日馳赴東平防所擬改駐開河各情由理合恭

摺由驛具奏至臣出省後一切地方應辦事宜委署藩司
盧定勳代行代勘緊要事件仍包封由臣管核辦合併具
陳伏乞

皇太后

皇上聖鑒訓示謹

奏

捻竄東境力籌防剿摺

同治六年五月十一日

奏爲捻蹤由豫竄入東境臣現駐紮開河調度各營力籌防剿恭摺仰祈

聖鑒事竊臣前於本月初三日將任賴股匪竄入豫疆勢恐北趨擬馳赴防所由東平改駐開河以便臨敵調度並將淮軍水師駐防之南陽鎮谷亭一帶湖水乾涸亟須籌布各情形由驛奏

聞在案臣初六日馳抵開河後初七日准軍機大臣字寄同治六年五月初五日奉

上諭李鴻章奏賊現竄新野東南之朱集水台等處據獲賊供稱有欲竄東豫之語如賊果東趨丁寶楨卽派兵迎

堵等因欽此仰見

聖主先機決策訓示周詳無任欽佩查

臣

於到防後迭據

探報該逆已竄入襄許舞葉等州縣汴省數十里外已見

邊馬等情

臣

速飭在防各營一體嚴防並逐段親歷查看

沿運河牆均各完整防範亦尙周密惟淮軍水師駐防之

谷亭南陽鎮一帶前因河水乾涸礮船人力難施當派道

員王成謙前往查看旋據飛稟該處新店以東及南陽鎮

一帶情形實爲可慮

臣

雖已專函飛商李鴻章妥爲籌議

惟賊蹤已近若必待李鴻章籌定舉辦恐誤事機因趕築

礮臺六十一座並就現有兵力勉爲勻撥將提督傅振邦

所帶青州兵七百名暨勇丁一營移紮南陽鎮地方復於

該鎮之南面嚴飭魚臺縣李淦限五日內督飭紳民協同
兵勇趕築圩牆以資憑守又抽調紮出河西預備游擊之
總兵姚紹修所帶兩營填紮傅振邦原紮東防汛地其新
店以東石佛閘西岸一帶又抽調駐防靳口河牆之總兵
陳錫周並駐紮河西游擊之副將張得魁兩營暨咨調護
兗州鎮總兵范正坦管帶營兵五百名在石佛閘以下正
西西北西南三路布紮爲犄角之勢以與傅振邦姚紹修
各隊遙爲聯絡並飛咨淮軍管帶水師提督徐道奎將該
營礮船於該處上下擇要分布往來梭織以期周密所慮
湖水日涸能否有濟尙未敢知正布置閒十一日申刻接
各營探報暨鄆鉅各縣稟報均稱逆股已抵曹州府城外

七十餘里之白茅集鄆鉅之玉皇廟張表集等處已見邊
馬放火由考城晝夜潛奔二百餘里竄入東境甚屬兇猛
又據常武營道員王成謙拏獲奸細趙振和一名供稱該
逆蓄意搶渡運河圖擾東省各等語查山東東三府各屬
尙稱完善該逆垂涎已久此次窮力狂奔一日夜竄入東
境二百里亟思乘我不備銳意搶渡運河臣諗料該逆北
竄勢必出此因切囑各營守定後戰且以河西地方一望
平原臣調紮西岸游擊之師因抽調過多若預行出擊僅
足支持一路而賊勢過衆路路可分設我軍截勦不及轉
落賊後是以督飭西岸各營晝夜哨探嚴兵以待俟賊蹤
稍近卽便相機截勦一可以穩顧運防一可以迎頭攔截

臣猶慮所籌未備復飭總兵趙三元將所帶礮船自安山至靳口百餘里勻段布紮用臻周密惟東省僅此兵數現因勻撥協防兵力頗形單薄不得不於東岸之濟甯東平汶上東阿各州縣飭令抽集民團協同營勇互守以助聲勢刻下河湖淺狹賊勢剽悍異常臣責無旁貸惟有竭力圖維於應防應勦各棧宜總當隨時妥爲籌畫至黃防現在水勢漸漲賊蹤難以偷越臣亦不敢以水闊岸高稍形鬆懈刻已札飭營務處東昌府知府龔易圖督飭在防水陸兵勇嚴爲準備並與直省防軍互相聯絡務保無虞以顧地方而慰

宸廑所有賊蹤竄入東境現籌防勦各情形理合恭摺馳

奏伏乞

皇太后

皇上聖鑒訓示謹

奏

捻渡運河督隊截勦並嚴布黃防摺

同治六年五月十三日

奏爲賊衆搶撲運河官軍鏖戰不支河牆隳守現飛調南路各防營由汶上會合親督進勦並嚴布黃防以遏北竄各情形恭摺馳奏仰祈

聖鑒事竊

臣

於本月十一日將捻蹤竄入東境

臣

駐開河

調度各營力籌防勦並抽調各營勻布淮軍汛地各情形由驛奏

聞在案

臣

拜摺後續接各路探報該逆大隊在鄆城黃家

海蔡家林等處邊馬四出竄擾查黃家海蔡家林均距運河尙百數十里時值河湖水勢正涸深恐該匪乘夜狂奔當飛飭員弁持令沿運周厯確查並於沿河渡口派隊嚴

查俾奸匪無得混迹又將河中船隻盡泊東岸以清河面
正布置間接派守沈口至靳口之東治平字各營飛稟該
逆於十一日亥刻大股已從鄆城梁山間道直撲沈口河
牆勢甚兇猛馬步各隊沿途游駛袁口靳口王中口安山
八九十里匪蹤布滿查沈口河水淺涸臣早經計及因派
平字右營參將金承德專紮一營以資堵遏嗣該營來稟
臣以駐紮開河距沈口一百餘里賊蹤咫尺且此處地闊
河淺又爲該逆屢次竄東熟路當躬督親兵嚴防隨調西
岸駐紮之兵前往接應又恐河西迂道莫及復飛飭派守
袁口一帶之總兵楊飛熊暗中抽派站牆四成勇隊先馳
赴援詎該逆狡計百出明攻沈口施放槍礮二十餘里絡

繹不絕我營竭力堵禦逆不得逞乃乘沈口兵勇鏖戰之時於戴廟水涸處突有賊馬數百騎步隊約四五百人衝突而至該處係平字後營都司朱萬美防守地段牆上勇丁見來勢兇猛亟放槍礮轟擊斃賊十數人該逆並不退縮馬上均帶洋槍隨手施放並令步賊跟蹤囊土填河繼以洋槍馬步一齊擁至其時總兵王心安在沈口堵擊聞戴廟十分喫緊亦帶隊馳至該逆愈聚愈多於對岸高阜用西洋炸礮對准河牆轟擊子落如雨復用火箭施放入圩民屋被焚驚亂兵勇站立不住遂乘勢擁上自子至卯鏖戰四時之久殺賊千餘人奪獲騾馬數十匹勇丁傷亡者計百數十人王心安等視賊衆我寡勢難抵敵卽行收

隊楊飛熊等營行抵靳口見東岸賊衆麕至河西到處賊股搶撲已成腹背受敵之勢亦卽折回自顧本營此賊搶渡運河官軍鏖戰不支河牆失守之實在情形也該逆現分兩股一股屯踞戴廟一股屯踞三里莊邊馬四散計該逆馬步共約五六萬人旣經渡運省防喫重當卽飛飭副將王正起所紮河西振字七營與總兵楊飛熊吉勝五營由臣親自督帶從汶上一路向東迎截以顧省防刻下賊已東竄南路防營可撤臣趕卽飛調道員王成謙常武各營迅來汶上一帶合力進剿惟查現在黃防甚屬緊要已一面飛飭東昌府知府龔易圖嚴密防範又趕調傅振邦帶隊於張秋等處擇要布守並飭濱黃各州縣嚴查渡口

將船隻盡歸北岸以杜該逆北趨之路惟河牆綢繆一載
爲東北屏蔽東省完區藉此保衛一旦不守臣督飭不力
咎無可辭惟有仰懇

天恩將臣從嚴治罪所有統帶東治各營總兵王心安分
防地方未能督飭營官杜賊竄越應請

旨將該總兵先行革職看守交部從重議罪管帶平字後
營都司朱萬美於認守地段不能力遏賊鋒致壞全局貽
誤特甚應請

旨卽就軍前正法以示懲儆其餘陣亡文武員弁俟查明
具實奏

聞臣現惟有督飭各營卽時追勦以冀稍贖前愆所有賊

衆搶渡河牆失陷現調各防營相機截勦並嚴布黃防各
情形理合恭摺馳奏伏乞

皇太后

皇上聖鑒訓示謹

奏

捻蹤竄近省垣督軍扼勦摺

同治六年五月十八日

奏爲捻逆渡運東竄經前敵官軍馳追分股牽制復經後
隊兜勦悉數殲除大股竄近省垣臣督軍兼程扼勦恭摺
仰祈

聖鑒事竊臣於本月十三日在汶上營次將逆衆搶渡運
東暨調營進勦各情形奏

聞在案查此次逆衆搶渡後銳意東奔臣於十二日申刻
在開河營次接到東治各營飛稟卽親督副將王正起等
各營馳援旋據探賊之大股麇集東平一帶邊馬擾出四
五十里臣以省城空虛亟須回顧當經飛調副將莫組紳
帶領紳字霖字兩營由東平星夜馳赴省垣並以黃防緊

要飛飭東昌府知府龔易圖嚴爲布守並調提督傅振邦
總兵趙三元水陸各軍回防黃岸以顧北路臣一面由袁
口帶隊折駐汶上過其東趨並飛調南路各營於汶上會
齊進勦十三日申刻該逆大股已竄入汶境戴村壩王汴
莊等處城外東南東北十數里外邊馬百十成羣紛紛四
竄當飭副將王正起總兵楊飛熊各隊分路邀擊該逆並
不接仗十四日副將王正起等督隊追勦探報賊大股圍
攻苑莊民圩王正起等催隊急馳進勦該匪遙見我軍卽
行解圍向東北一帶狂奔王正起等躡蹤追至甯陽城外
賊馬或東或西忽多忽少搖惑我軍均經分隊擊退生擒
髮賊十數名救出裹脅難民百餘人十五日寅刻王正起

楊飛熊暨東治各營探明賊之馬步大股由甯陽縣境之岡屯北趨沿汶河行駛當卽拔隊馳追臣於是日午刻自督道員王成謙所部常武各軍到甯據探稱賊先出甯境分股竄擾甯陽東南之滋陽曲阜鄒縣中山集一帶臣以該逆狡計百出其分股旁竄實圖牽制我軍不敢一意前進且爲抄襲後路之計當卽飭派道員王成謙督帶總兵姚紹修陳錫周等四營出紮距甯三十五里之岡屯預爲攔截是晚見東南有火光數處十六日卯刻王成謙督飭姚紹修等帶隊前進行至屯南十餘里茅莊地方該匪馬步各五六百人紛紛回向北駛一見我軍卽駐紮不動姚紹修等督隊迎勦該匪率衆抗拒經我騎迎上施放連環

洋槍將首先執旗一騎轟斃並殺馬步百餘名該逆敗竄我軍兩路抄追其步賊翻山四竄經臣先派常武營馬隊參將李炳武四面包抄殲除殆盡馬賊尙存二百數十名被姚紹修等營圍住賊馬多被傷倒陣斬一百餘名姚紹修及守備蔡忠順衝入賊中將執令匪首邵庭漳生擒馳出匪首邵元明等見勢不能敵率領餘黨聲言乞降總兵姚紹修陳錫周等卽領弁勇生擒匪首邵元明解克終劉玉扶葉添佑侯妮蕭得勝李慎齋等共一百八十餘名並獲馬一百餘匹槍礮旗幟器械數百件隨卽收隊該營等各將生擒老匪解驗臣逐一提訊內有孔昭亮等四十餘名訊係被裹未久尙非甘心從逆當經分別正法矜釋其

邵庭漳邵元明等一百四十餘名均積年悍賊髮長二尺有餘悉行正法此後路各隊將分股賊匪殲除殆盡之實在情形也十六日探悉渡汶大股賊匪由東鄉夏張急趨萊蕪青石關意圖東竄因山路多險且經臣先期札飭該地方官集團防守逆不得過旋復折回泰安由新莊大路圖竄省門副將王正起總兵楊飛熊暨東治各營緊躡在後沿途截殺尾股馬賊百餘名髮賊二百餘名臣在甯小駐一日將東南股匪辦竣後卽於十七日親督後隊進紮夏張策應前敵併一面飛飭藩司潘鼎新由濟甯取道滋陽曲阜速行進隊會合兜擊行至途次探聞該逆大股已竄近省垣段店一帶查省垣防務前接署藩司盧定勳來

稟已募勇丁四千名防守並與臬運各司及在省道府委員嚴爲布置今有王正起等營緊跟賊後可保無虞當飛飭各該營迅速進剿並擬親督常武各軍由肥城長清間道馳赴省城抄出賊前與王正起等營前後夾擊庶期得力仍一面再行飛飭齊河各州縣將黃防渡口大小船隻嚴行封查一併提歸北岸並由省多派幹員前往巡查以期黃防周密免致北竄除續將剿辦情形再行馳報外所有連日擊賊並督隊進剿各緣由理合繕摺由驛馳奏伏乞

皇太后

皇上聖鑒訓示謹

奏

擒逆東竄省垣安堵督軍追勦摺

同治六年五月二十三日

奏爲擒逆避兵東竄省垣安堵現復督軍緊追並咨調淮軍分路兜勦恭摺仰祈

聖鑒事竊

臣

於五月十八日調派各軍先後追勦竄匪將

分股殲除並督隊回顧省防各緣由馳陳在案

臣

拜摺後

卽由夏張督飭常武一軍前進行至天平店地方探報該

逆於十六七兩日竄近省垣大股屯紮距省四十里之楊

家台至雒口止經在省司道會督文武各員紳添勇集團

晝夜防守所派前敵副將王正起總兵楊飛熊等各軍亦

將趕到等語

臣

接報之下卽親督常武各軍由閒道繞出

肥城長清急馳二百數十里冀出賊前與各軍前後夾擊

痛挫兇鋒詎該逆見省防嚴密後路大兵相繼踵至正值
雨夜乘閒潛逸竄往章邱鄒平一帶十八日午後王正起
各軍馳到賊已陸續竄盡王正起等並不停滯躡蹤緊追
臣十九日到省以省城根本重地復與司道等周歷城圩
略加布置酌留紳字霖字四營交署臬司衛榮光統帶分
紮各圩外以備緩急並飭該司道等會督在防文武員紳
仍前嚴守以防回竄其黃防緊要復經飛飭遊擊楊長林
督帶礮船卽日向濟陽齊東青城蒲臺一帶梭巡並飭總
兵趙三元將運河船板設法駛入黃河以資巡哨又飭郭
大勝帶勇五百名守備王萃帶領馬隊二百三十餘名在
齊河各縣上下游西岸分紮來往巡查又飛飭東昌府知

府龔易圖駐紮張秋督飭所調出各營兵勇在於濮范壽張張秋一帶嚴防並通飭濱黃州縣一體集團守禦足紓宸廑臣部署定後卽於二十一日督帶道員王成謙所部常武各軍向東進勦二十二日馳抵鄒平接據探報該逆於二十日竄過鄒平二十一日竄赴新城池北一帶復接王正起等稟報我軍追勦甚緊該逆節節繞避略不停喘二十一日追過鄒平城北二十餘里已將馬賊追上甫經開隊攻擊該逆略一旋繞遂卽狂奔不敢戀戰現復督隊馳逐二十二日已由長山追過新城等情臣思該逆詭謀避兵非前繞後追斷難得戰現在該逆探係由新城池北奔竄查新城池北僅高苑博興兩縣此外多係河道別無

可圖該逆若由博興他竄必由臨淄樂安一路逸出臣擬
親督王成謙等軍於二十三日由新城分道繞出臨淄樂
安預伏其前而令王正起等軍緊躡其後該逆若由高苑
博興竄出當可攔頭一擊也惟是臣進勦鄒平一路係入
東府大道賊由此竄入臣必得由此緊追一可以圖勦擊
一可以顧城圩但賊勢甚衆臣一軍僅能跟追卽有時分
軍繞截深虞單薄查東府三面距海山徑亦多崎嶇若以
一軍跟蹤而又有一軍由沂州莒州取道諸城穆陵關一
路迎截而前必可得手現藩司潘鼎新已抵濟甯提督劉
銘傳已抵鄆鉅兩軍皆在東境應卽就近商辦臣已咨調
劉銘傳一軍由莒沂向穆陵關一路前進潘鼎新一軍由

萊蕪向博山一路前進並飛咨督臣李鴻章迅速轉咨冀收速效臣刻惟有親臨前敵視賊所向就現有兵力跟蹤馳逐不令停留以免地方被害至勦辦之際遇有可以繞前截擊之時則分軍繞之以期痛勦除俟接仗後再將勦辦情形具報外所有賊蹤東竄省城安堵並督軍追勦各緣由理合恭摺馳奏伏乞

皇太后

皇上聖鑒訓示謹

奏

平度州馬蘭堡大獲勝仗摺

同治六年五月三十日

奏爲捻蹤東竄親督各軍跟勦追及於平度州之馬蘭堡大獲勝仗恭摺仰祈

聖鑒事竊臣於本月二十三日在鄒平營次將賊蹤東竄督兵緊追並分兵繞截各緣由馳報在案拜摺後卽親督道員王成謙帶領常武各營星夜由鄒平長山閒道疾馳一百四十餘里繞出臨淄以備迎截詎二十四日辰刻行抵金嶺鎮距臨淄三十餘里探報該逆已於二十三日夜仍由高苑邊境折回新城急向臨淄東北逸出前敵王正起各軍緊躡其後等語查該匪由高苑境折竄臨淄計日行二百三四十里避兵如此之速殊深憤恨當於是日抵

臨淄後飛飭王正起王心安楊飛熊各軍務必緊追不准

稍息

臣

於二十五日卽督隊由壽光跟追二十六二十七

兩日追至濰縣昌邑賊已於二十七日午刻由昌邑之北
于家莊渡過濰河向平度州一帶東竄王正起等亦於是
日追至平度二十八日臣過濰河以河水驟發該處船不
敷渡卽搭橋速進因思該逆擾及東省未及半月盤旋一
千數百餘里我軍日夜追逐每遇及賊之時該逆明知步
不及馬總以騎賊擾我迄難接仗臣先於二十六日卽函
令前敵王正起等將所有該營營哨及差弁人等各馬匹
湊積五百餘名交王心安管帶作爲前隊並飭各隊精挑
健銳六成隊伍分帶前進其餘均作後隊夤夜馳襲冀可

一戰痛勦二十九日臣抵平度接據王正起等稟報該營於二十七日晚追賊至平度卽據探稱該逆於是日夜大股全踞州城東三十餘里之馬蘭堡地方王正起王心安楊飛熊等會商定於四更出隊王心安帶領湊集之馬隊五百餘人先向東北潛進楊飛熊王正起帶領挑選之六成精銳會同守備劉家興分帶平字三營由東南直出各銜枚疾走二十八日未及黎明王心安馬隊行及馬蘭堡遇賊騎一千餘人甫經起行王心安卽帶隊直前衝進該逆見我騎兵無多來往相持約半時許不能取勝王心安奮勇大呼冒死衝突各勇喊殺繼進賊氣少卻我兵卽乘勢殺入立斃騎賊五六十名該逆見我兵猛進齊吹號筒

賊之馬步大股陸續齊集團裏而前我兵眾寡不敵王心安拚死衝突適王正起楊飛熊聞知王心安已經接仗急催隊從兩旁抄入劉家興從後掩至分三路撲進王心安見步隊趕到勇氣愈加卽直前將賊衝爲兩段殺斃馬賊一百二三十人賊見我兵一到分股抗拒王正起楊飛熊以連環槍礮擊其馬賊各斃賊二百餘名馬賊少退不敢前逼急令步賊猛撲馬賊紛紛旋抄我軍之後王正起等復分槍礮連環施放尾護後路而以長矛夾槍擊其步賊我兵各有關心奮氣百倍合力夾擊斃步賊一千三百餘人後路馬賊又被劉家興分營攔截槍礮斃賊三百餘人自卯至戌力戰八時之久賊眾奔潰紛向東南東北逃竄

我軍乘勢追殺又斃步賊一千餘人馬賊二三百人至亥刻追及安賢莊始行收隊共計殺斃長髮馬賊九百餘人步賊二千五六百人生擒二百餘人中傷逃亡者千餘人奪獲騾馬八百餘匹大黃旗龍旗四十六桿刀矛器械無算查點官弁兵勇陣亡受傷約四十餘員名容再查明彙奏至賊被創後分東南東北亂竄前敵各軍亦於二十九日五更仍拔隊分投緊追臣接稟後以該逆被勦敗竄或南或北尙未有定正籌慮間復接前敵探稟賊敗仗紛逃三十餘里外連夜合股向東北急奔該營等亦卽合隊向東北緊追等語查該逆若竄東北必由萊陽棲霞招遠前奔惟賊情過狡或於敗潰後引我兵向東北追躡復乘閒

折回膠州一路竄出莒州日照使我窮追無及亦未可定
臣刻飭王成謙迅帶所部常武軍先行取道萊州迎截與
前敵各軍會合夾擊如賊折竄膠州一路卽行馳回爲期
尙不甚遠臣現祇可暫在平度適中之地自帶馮義德陳
錫周二營並親兵四百名暫駐再視該逆所向以定行止
並飛咨行劉銘傳潘鼎新各軍迅速前進以期合勦此後
勦辦情形容臣隨時馳報所有追賊獲勝緣由理合恭摺
由驛馳奏伏乞

皇太后

皇上聖鑒訓示謹

奏

分段布守黃防片

同治六年五月三十日

再賊現在東境刻雖趨重膠州萊陽兩路而黃防仍宜嚴守臣迭奉

諭旨飭令嚴密堵禦二十八日又欽奉

諭旨東軍防守南岸勢難兼顧北岸應否將直隸東南各鎮之兵盡數調赴河干以資厚集之處著劉長佑崇厚相機布置等因欽此跪誦之下仰見

聖主神謨廣運體恤周詳莫名感悚查黃防汛地去歲曾國藩奏明以范縣豆腐店爲界與直省分防東省自豆腐店以東至張秋沙灣爲止計長一百數十里前經奏明飭委東昌府知府龔易圖專辦在案茲賊已入東則河防自

范縣至武定屬之鐵門關縣長千餘里在在須防地段愈長兵力愈增龔易圖一人萬難兼顧臣特爲劃分地段俾專責成自豆腐店至張秋仍飭龔易圖認守並調東昌壽張濮州范縣泰安各營兵丁一千二百名華字道字兩營勇丁歸該府調遣照舊布置自張秋至齊河咨調提督傅振邦督帶青州兵七百名郭大勝勇五百名擇要布守自齊河以下至鐵門關現飭武定府知府張鼎輔認守並調副將張得魁莫組紳所部兩營與該府會商分哨布置復飭各該府嚴督所屬州縣集團協助又將遊擊楊長林所帶礮船分布自張秋至齊河一段巡歷總兵趙三元所帶礮船自齊河至鐵門關一段巡歷另派候補道張文林於

上下游總司巡查用期周密其沿河渡口已嚴飭各該府
督飭所屬濱黃州縣將小渡裁併大渡渡船盡提歸北岸
遇有濟渡必須確查來歷始准放行兵勇官弁飭其嚴加
防查以杜假冒昨接龔易圖來稟以張秋蓮花池兩處復
經直隸派來都司陳春江帶礮船七隻大名府知府楊詠
春派來礮船十二隻在彼協防又准直隸督臣劉長佑咨
明飭派水師馬隊來東協助並擬抽調總兵劉景芳全軍
俟河防緊要飭赴齊河協守通商大臣崇厚亦經調派洋
槍隊在景吳交界駐紮布置益爲嚴密臣惟有督飭調防
兵勇暨各道府州縣實力堵禦並督現在追勦兵勇力遏
兇氛一面咨請李鴻章迅催淮軍速進冀蹙賊於海隅聚

殲醜類以紓

宸廑所有分段布守黃防各緣由謹附片具陳伏乞

聖鑒訓示謹

奏

卽墨連捷設法蹙賊摺

同治六年六月初九日

奏爲賊由海陽折竄卽墨縣境勞山一帶意圖南竄官兵由西南緊躡進勦連獲勝仗賊復回向東北平度萊州奔竄現擬相機攔截期於扼守膠萊河爲合圍聚殲之計恭摺仰祈

聖鑒事竊臣前於五月三十日將追賊至平度州境馬蘭堡接仗獲勝具報在案初七日奉到

諭旨該逆向東北連夜急竄丁寶楨飭令前敵各軍分投追勦惟逆股人數衆多騎又剽急恐其誘兵東追乘閒折回膠莒南竄沂郡丁寶楨當妥籌兼顧杜賊回竄不可專事尾追致賊延蔓等因欽此仰見

聖訓周詳決勝千里無任欽佩臣於前次拜摺後連日迭

據探報該逆被懲後日行益速二十九日已竄出萊陽前

敵各軍仍躡其後三十日竄及海陽臣料該逆必竄甯海

入福山奔黃縣出萊州一路當飭道員王成謙於初一日

帶當武各營馳赴萊州並囑其緩爲進取俟賊入福山黃

縣後再行於招黃兩縣分兵扼紮杜其出路以待援師合

勦正布置間接據連日探報賊至海陽境內初二日向東

北駛竄有擾甯海福山之勢乃行二十餘里忽折回海陽

趨卽墨沿海南竄初三日擾及金口我軍於初三日亦由

三家園下鮑村等處向西南跟追已至五龍河等語臣以

賊旣回竄卽墨金口勢必由膠州一路竄出莒沂遂將萊

州一軍撤回平度擬於初五日移駐膠州截其南竄之路旋接藩司潘鼎新來函以統帶鼎軍於初五日巳刻可抵平度商辦一切臣略爲停候是日潘鼎新帶隊趕到卽與面商以臣移駐膠州扼賊南竄平度爲西竄大道卽令該司暫駐以資堵截臣遂於初六日拔隊初七日午刻馳抵膠州接據王正起等並卽墨縣稟報該逆於初三日竄至金口後我軍於初四日亦抵金口賊知官兵追至卽於是日由金口竄向卽墨縣城各軍於初四日五更拔隊由金口追至雙山適賊攻撲民圩聞我軍追至踴躍奔竄衣服器物遺棄載道救出裹脅二三千人賊竄撲卽墨縣城經卽墨縣知縣楊鴻烈督率團勇開礮擊退並出城追勦小

有斬擒賊向勞山一帶竄逸是晚我軍亦抵縣城西南三里莊駐紮鄉民見官軍一到紛紛泣懇以勞山避難富戶極多亟求救援總兵楊飛熊副將王正起已革總兵王心安等詢悉賊衆在花院山鐵基口內相去三里莊十五里之遙肆行焚掠各軍挑選八成隊伍在城南取齊楊飛熊率領吉勝四營由正南進勦王正起率領振字六營由東南進勦王心安率領東治六營由正西進勦三軍一齊搶撲山口是日陰雨初晴該逆不料我師深入猝不及備四路驚竄王正起等率衆分頭趕殺斃賊甚衆我軍乘勢直搗自大廟至石町連敗賊數十數莊馬賊以山徑不便乘騎皆下馬接戰抵死抗拒我軍均以刀矛儘力對殺後用

小槍連環繼進賊眾敗潰共斃馬步賊三千餘名生擒長髮數十人救出難民七八千人奪獲竹桿長矛無算王心安陣斬馬賊一名髮長二尺有餘皓白如雪詢之生擒髮賊皆云李姓曾封僞王現帶萬餘人等語卽將首級懸示城門此次接仗王正起等以山徑叢雜恐各勇搶馬失事隻騎不准掠取所有賊遺騾馬均經殺斃時已二鼓始行收隊卽在勞山口對面土嶺駐紮與賊相距僅八九里初六日辰刻我軍正擬出隊驟見該逆馬步無數從鐵基口山上下蜂擁而出我軍視賊騎過多未可輕進排列連環槍礮對賊轟擊該匪漸退仍歸入山口楊飛熊等以賊情詭詐必須設奇制勝會商於夜間潛偷賊營另選勁旅作

爲接應是夜三鼓王心安率親兵二百人悄入山口行未數里四面山凹中喊聲振天陡出悍賊數千人磨聚而至王心安見賊勢過猛率衆衝殺而出適楊飛熊王正起率隊接應賊正追趕間被楊飛熊王正起帶衆橫衝吶喊截擊賊衆大亂王心安亦帶接應後隊隨擊斃賊約千餘人該逆自相踐踏屍骸徧野踉蹌奔潰昏黑之間未定竄向何處我軍暫行收隊因黑夜偷營哨弁勇丁受傷陣亡者約有數十人俟查明具報等情前來伏思此股逆匪既悍且衆兼以我步賊騎勢有不及而前敵各軍窮追日久深虞疲乏爲賊所乘幸將士效命兩日之間迭獲勝捷稍挫兇鋒惟期各軍早日會集一鼓殲除庶足上慰

宸廕至

臣

前接督

臣

李鴻章來函以議定扼守膠萊河蹙

賊海隅用收聚殲之效且約暫緩窮追實爲上策

臣

現極

力照辦迭飭前敵各軍與賊羈縻偏出西南向東北遠逼

臣

自行由西南攔截其回竄沂莒潘鼎新截其回竄平度

皆冀漸次逼蹙以期集事惟膠萊河沙淤水淺縣長三百

餘里能否確有把握未可預知現據探報及前敵來稟以

賊經兩日擊敗後業經向膠州南竄行十餘里探知膠州

有兵仍折向東北萊陽萊州一路奔竄

臣

前與潘鼎新商

定以賊走萊州卽令該司移駐昌邑扼其西竄

臣

擬自督

王成謙所部常武各營確切探明後由膠州移駐高密仍

防該逆南趨截其歸路現在督

臣

李鴻章所派各軍均已

速進因道里太遠一時遽難趕及臣僅就現有各軍相機分布不遺餘力所慮萊州萊陽以西一片平原臣以一軍跟追兩軍攔截中間懸隔幾二百餘里能否扼截殊難期必惟臣責任封圻旣不能不爲久遠之謀共圖滅賊又不能不救目前之急冀固完區是以前敵各軍不得不令其跟追又不可令其窮追祇得諄飭其由西南步步緩逼與賊牽制不卽不離期合機宜而收遠效除再將以後辦理情形隨時具報外所有初五初六兩日勦賊獲勝並設法蹙賊各緣由理合由驛馳奏伏乞

皇太后

皇上聖鑒訓示謹

奏

會築河牆防局未能遽定摺

同治六年六月十八日

奏爲會合淮軍分段築守膠萊河牆甫經動工探報賊已南竄防局未能遽定恭摺馳奏仰祈

聖鑒事竊

臣

於本月初九日將前敵各軍在卽墨勦賊獲

勝該逆折竄東北各情形馳報在案十三日接奉

諭旨賊蹤飄忽若乘官軍未集聞風遠颺辦理又無把握卽著李鴻章飛檄各路兵勇迅往兜擊毋失機宜丁寶楨亦當督飭東省各營會同扼勦務將此股賊匪就地勦除勿令兔脫等因欽此仰繹

聖謨莫名欽誦迭據探報該逆自卽墨敗潰後折竄萊陽於初九初十十一等日由萊陽境內竄及招遠黃縣等處

前敵各軍仍在後追躡二十三十四等日有竄入登福之報臣查該逆奔突數省已成流寇非偏困一隅四面兜擊難期奏效臣前擬將該逆逼歸登福於招遠甯海黃縣萊陽分紮扼勦苦於兵力不敷曾經函商督臣李鴻章會辦嗣於本月初五日接李鴻章來函議就膠萊運河設守再移守運之師接防膠萊河騰出各軍躡賊緊勦取勢較寬逼賊較穩臣再四籌度於目前辦理情形誠爲扼要之策亟應竭力照辦臣自平度移軍膠州後卽暫駐數日以顧南路兼待各軍之至十一日藩司潘鼎新自平度移紮新河間提督劉銘傳亦於十二日進紮膠萊河西岸之瓦廟口接據總兵董鳳高沈宏富來函該兩軍於十八九日

亦可到膠查膠萊河自北路海倉口至南路膠州之柳林口計二百八十餘里臣與劉銘傳等迭次函商自海倉以北尚有沙灘潮退時約縣長百餘里潮至時亦數十里不等該處灘岸不堪紮營築壘潘鼎新力任其難自海倉口守起中間折向濰河築牆扼守至新河關止約五十餘里劉銘傳自新河關守至大成寺約百零數里自大成寺以南六十餘里至吳家關擬歸奇鳳兩軍接守臣所部道員王成謙常武十營及臣親兵一營自吳家關守至柳林口計六十八里柳林口以南至塔埠頭十五里潮汐往來大半淤泥營牆均不能修築必須設法堵扼臣前於十三日拔隊赴海倉口行三十里聞賊有回竄西南之信臣卽行

折回改道由高密前進以遏之十五日行至朱陽集探無賊蹤適知潘鼎新已商定在海倉口駐守臣遂於十六日仍折回膠州督飭王成謙各營於柳林口至吳家閘一帶分段築牆又恐地長兵少難於分布復飭膠州副將玉山調發膠州兵一百三十六員名又添募壯勇九百名協同堵築銘鼎兩軍日內亦均已動工其吳家閘以北至大成寺一帶俟奇鳳兩營到時卽催其一律趕辦此河久經淤塞隄岸均係沙土統計每營汛地均皆五里有餘兵力殊嫌單薄現就目前竭力布置但冀賊迂迴數日防局或可有成乃十七日甫經開工是晚卽接探報賊股自竄福山後狂奔三百餘里南竄卽墨馬山一帶又據常武營馬探

回稱十七日清晨行至離卽墨十五里之山頭圩見卽墨
西南北三面皆有馬賊環繞沿途探問卽墨東北一帶直
至七級村均係賊隊距膠僅六七十里等語細揣賊勢大
股均竄卽境必由馬山向西南回竄圖向膠境南奔現在
河牆甫經動工基址未立東軍以五千餘人布散六七十
里閒無可憑扼非特無以杜賊奔突設遇大股搶撲軍勢
渙散潰敗堪虞臣再四思維現飭王成謙一面於東北派
探哨望一面仍趕築河牆得辦且辦以期力就防局如賊
於日內銳意衝突亦惟有將各營挨段調齊盡力迎勦但
得一擊爲幸斷難兼顧防局轉致失機無補臣迭接李鴻
章來函切囑臣暫緩追勦恐賊驚避脫走臣查此次賊竄

東境到處均未敢攻撲城圩皆以緊追之力前此軍勢未
集防局未辦若諸軍離賊稍遠誠慮該逆得暇攻破城寨
肆行蹂躪且仍路路可以竄逸臣因屢飭前敵一軍繞出
西南追躡遇賊仍擊逼入東北一面嗣聞賊至福山已入
海隅卽飛調各營暫回膠州協守膠萊河藉以休養傷病
俟防局一定卽會合淮軍進剿現在各該營一時未能卽
到頃又飛飭由平度境內繞出賊前迅回膠州究未知能
否趕及今膠萊河僅銘鼎兩軍及臣部各營已經施工其
自大成寺至吳家閘一節尙未動手惟均係甫經草創一
有賊傲動虞牽掣以後防局能否有就屆時再行馳報茲
謹將現辦及探報賊情恭摺由驛具陳伏乞

皇太后

皇上聖鑒訓示謹

奏

修整河牆並北路勦辦梟匪摺

同治六年六月二十九日

奏爲近日賊勢未動亟籌修整河牆以杜竄逸並籌北路勦辦梟匪各事宜恭摺仰祈

聖鑒事竊臣於本月十八日將會合淮軍分段築守膠萊河牆等情馳報在案本日奉

上諭運防膠萊河防均待月餘之久賊蹤飄忽必不肯坐困登萊似應量爲變通節節橫擊等因欽此仰見

聖謨廣運指示周詳無任欽感竊捻逆自十七日盤擾卽墨後圖向膠州一路南竄二十日夜大麻灣柳林口東岸賊騎往來窺伺大股相距僅三四十里維時河牆未就各營堵築站隊頗費經營幸得阻遏二十三日調回前敵各

軍馳抵膠河東岸二十四日臣冒雨巡視河牆調船接渡
各軍兩日後始抵西岸臣初以五千餘人扼守吳家閘至
柳林口六十八里其柳林口以南十五里不堪築牆仍須
設法堵扼兵力本極單薄茲各軍調回挨段填紮兵力稍
厚而吳家閘以北至劉家莊十五里改歸東軍接防臣卽
撥派四營補紮飭其趕築河牆日內可以竣工藩司潘鼎
新因海倉口不能設守由新河口改向夏營灘河守至夏
店計六十餘里平地築牆三十餘里兵力甚薄臣又分派
四營前往協助查膠萊河現因連日大雨水漲丈餘大麻
灣以南水已突過河牆該處本無隄岸沿灘築牆多形坍
塌日內雨意漸止水勢卽見枯乾河牆現須重加趕築惟

該處多係漫灘沙性鬆弱非有重兵扼守難期完密柳林口以南至塔埠頭十五里雖經雇募民船安設槍礮暫資堵禦水落後亦須重加查勘嚴爲設法其各營河牆均有衝損之處現飭其隨時修補不任疏玩至淮軍分防地段河牆亦漸次修築完備似此防局粗就自應力求完固以俟李鴻章換防諸軍到時卽行抽軍會合進剿惟防地綿長數日後水落牆單扼守極爲不易幸李鴻章添派宋慶王永勝兩軍陸續前發計日可到兵力較足至將來進剿事宜臣自應亟籌重軍會合淮軍竭力辦理又恭讀

諭旨煙臺防軍是否足用奉天所留天津之洋槍隊五百名昨已據都興阿奏令回津著崇厚探訪情形妥爲調度

等因欽此臣查煙臺在膠萊河東防局若成該處較形喫緊前經通商大臣臣崇厚派來洋槍隊五百名防堵極爲得力臣現一面咨商崇厚酌度如奉天之洋槍隊回津後可否能令再赴煙臺會合前隊協防請其察看籌辦本日復欽奉

諭旨直隸晉州等處梟匪經劉雲鶴鄧在仁等分投追剿武定等處梟匪充斥又逼近捻氛難保不勾結爲患著丁寶楨嚴飭地方文武各官實力勦捕等因欽此查此股梟匪臣於六月二十四五等日迭據東昌府知府龔易圖二十日稟稱直隸晉州梟匪經官軍擊敗後餘匪二三百騎南竄曲周縣境裏脅人衆搶劫馬匹嘯聚已及七八百名

十九日竄至臨清州之子溝集二十日又由曲周之布村寨竄入館陶之張官寨柴家寨等處直逼館陶衛河西岸等情續據臨清館陶邱冠等州縣稟報情形大略相同當卽飛飭龔易圖抽調防河東軍華字營勇五百名壽張營兵二百名前往勦辦其所遺防守汛地亦經檄飭委辦黃防之候補道張文林移紮張秋與直軍會同兼顧旋據龔易圖復稟張秋防務已面商駐防該處之直隸臬司張樹聲派隊兼顧該府於二十一日抽調東軍前往堵勦辦理尙爲迅速臣恐該府帶兵單弱又咨調提督傅振邦督帶所部青州兵七百名遊擊郭大勝勇五百名並調守備王萃馬隊二百名會同前進二十八日接龔易圖稟報該逆

竄至館陶境後經釐局委員馬映奎緝捕委員耿光祐先期雇募壯丁五百名會同東昌營參將韋應麒於二十一日夜拔隊進剿該梟匪聞風回竄邱縣屬之馬頭村古營城等處向直境奔竄二十三日官軍仍前追剿華字等軍已抵館陶業經飛飭合隊剿辦等情臣查此股梟匪若不亟爲籌辦句結嘯聚深恐蔓延惟慮該梟等兵來則散兵去則聚終無了局刻下雖已回竄自應會合直軍極力兜圍以期撲滅臣已飛飭龔易圖會同傅振邦督飭各營會合直省追剿之兵實力辦理不得稍形鬆懈其武定府一帶亦已飛飭該府飭屬一併搜捕以防句結如該梟等聞兵卽散已密囑該府將所帶各隊潛布要隘處所嚴督各

地方官購綫密探四處搜拏庶幾根株可絕惟龔易圖前經奏派辦理張秋防務刻下該府所屬館陶莘冠等縣均與直境毗連臣已飭該府仍回東昌督飭各營專辦勦梟事宜俾無旁貸其所遺黃防汛地除經張樹聲派隊兼顧應飭候補道張文林一律會商照料以期周密所有賊蹤未動現辦膠萊河防並北路勦辦梟匪各事宜理合恭摺由驛馳奏伏乞

皇太后

皇上聖鑒訓示謹

奏

捻撲膠河官軍擊退現辦梟匪摺

同治六年七月初五日

奏爲捻逆全股搶撲膠州河防經官軍擊退並陳梟匪被
勦回竄直境現籌辦理情形恭摺仰祈

聖鑒事竊

臣

於六月二十九日已將修整河牆期於杜賊

竄逸並飭軍籌辦梟匪各事宜馳報在案查

臣

軍汛地係

通諸莒大道麻灣店口一帶又向爲該逆南竄要衝歷訊
擒匪皆稱賊亟圖向膠州一路過河往青口歇息爲斫取
竹竿之計自前月二十日河牆甫築馬賊卽不時窺伺二
十七日後雨勢既止水勢陡消自店口以南河牆被雨衝
塌之處各該營因沙土鬆軟舊牆旋修旋壞重立基址晝
夜堵築倉卒未就初一日辰刻平字右營汛地突見賊騎

數十匹鳧水偷渡該營斃賊三名擒獲賊目李明山一名
賊騎遂遁是日巳刻賊股全渡沽河先以悍賊數百騎直
逼膠河東岸至店口一帶以洋槍礮轟擊河牆係屬吉勝
營汛地新牆甫經草創勢甚喫緊總兵楊飛熊督飭各營
力堵抽出親兵一營上下策應施放連環槍礮斃賊三百
餘名相持至未刻賊始向北略退繼而大股三四萬人麇
至分爲二十餘起布列河岸猛撲閘子集常武軍曹標營
汛地道員王成謙親督洋礮隊登牆固守連發開花礮擊
斃賊數十名賊始向東南略移里許旋又紮定賴逆一股
緊撲吉勝營河牆任逆一股仍猛撲曹標營河牆王成謙
分飭都司高福德帶親軍一隊協同曹標營站牆連開炸

礮斃賊二百餘名又飭洋礮隊營官焦宗良協守吉勝營
汛地王成謙親督大礮移向吉勝營河牆對准賊股連次
施放將該逆紅藍白大旗轟倒斃賊數百人相持三時之
久賊股盡向東南竄王成謙卽飭參將李炳武帶馬隊一
營渡河緊追直至沾河西岸砍斃賊約二百餘名奪獲大
旗二十餘桿騾馬驢百餘匹營官李楹焦宗良等抽選奮
勇勦擊尾賊斬殺百數十名生擒百餘名沾河水勢較盛
該逆被官軍擊敗後又被馬步隊追勦不辨深淺捨死爭
渡淹斃一千數百名溺死驢馬不計其數是晚賊向東北
竄去連日探報該逆自平度一帶回竄萊陽境內據擒獲
賊目李明山供稱賊中有洋匪二名勾結洋人百餘名到

勞山口與任賴相見仍令潛回購辦洋礮查該逆勾買洋人軍火臣先已慮及於平度州境追賊時曾函囑登萊道潘霽在煙臺嚴加防範茲據賊供尤應確查防備臣卽飛咨各省通商衙門傳知各國領事嚴爲稽查並咨登州鎮及飭該道多募師船分巡海口嚴查洋匪出入以杜勾聚其有海口各州縣亦飭雇募船隻派役嚴查惟該逆此次雖搶渡未遂勢不肯坐困絕地以後漸次猛撲不可不防臣現飭各營晝夜舉工所有重築河牆數日以內可以粗竣自劉家莊以北經淮軍分段扼守自必足資堵禦臣已函致其一體嚴防惟北路海倉口一帶藩司潘鼎新因不堪築牆設法辦理自夏店之石灣口起北接濰河南接新

河口平地築牆計三十里又因濰河不可空虛潘鼎新騰
出兩營函商東軍會合堵紮臣已派東治四營前往頃據
潘鼎新來函濰河自夏店至新安莊六十餘里水勢日瀉
其淺處亦策馬可渡新安莊至海口三十餘里水勢較深
然亦不可空虛無人等語臣初議在北路扼守自六月十
五日由高密途次接潘鼎新等函稱北路均歸淮軍設防
囑臣布守南路臣專顧南路又值情形喫緊連日親督各
營築牆站隊已不遺餘力北路情形有銘鼎兩軍分布無
須分顧日內宋慶一軍已抵河岸冀可迅爲堵紮賊在東
境臣惟當力籌勦辦庶可稍慰百姓之心昨前敵各軍暫
行調回助守實以賊既有可圖之機亦不容貪目前而昧

大計然自各軍到防後河東城寨日來告急只得暫爲隱忍負疚吏民愧痛交集臣竊以防局一定卽應迅力進勦且防地過長延日遲久恐生他變臣現在趕辦河牆力求完密督臣李鴻章俟運防稍固自卽撥軍換防臣仍一面函商請其迅催各軍前進以期早日勦辦冀可不失機會臣亟俟替防有人卽得督飭東軍力勦以顧地方至北路梟匪前經竄至南館陶一帶被官軍追勦竄回直境後前據東昌府知府龔易圖稟稱二十三日委員馬映奎耿光祐等追賊至邱縣之馬頭村一帶賊聞風竄逸搜捕餘黨張七等五名皆係積年猾匪伏匿僻村暗爲勾煽當卽訊明正法二十四日該員等會同邱縣知縣程惠昌出境追

勦至曲周縣之龍瞳一帶僅騎賊二百名已向曲平等處
狂竄所有句結餘匪均各散盡獲賊目楊五一名殺賊四
名奪馬五匹該員等因連日窮追糧盡且直隸官軍已由
曲周境內向北接追因巡哨至鐘鼓集一帶二十六日仍
回館陶等語查此等匪股無兵則聚兵至則散是其故習
現經龔易圖飭參將黃兆昇帶華字營暫駐臨清之下堡
寺東昌營參將韋應麒暫駐館陶壽張營遊擊陳占鼐暫
駐邱縣之馬頭村如賊蹤回竄仍令出境勦辦若賊勢日
遠擬令壽張營先回河防華字東昌兩營仍駐臨清以資
彈壓耿光祜等素能密查伏匪蹤迹飭令廣布眼綫搜捕
黨類以絕該匪句結之萌至

臣

前咨調提督傅振邦督帶

青州兵七百名郭大勝勇五百名會同華字等營前進現在賊股雖經竄散惟根株未盡仍虞勾聚現今傳振邦仍暫駐館陶臨清之間查看無事再行回駐原紮汛地會合直軍防堵河岸所有捻逆搶渡膠萊河防經官軍擊退並籌辦梟匪各情形理合恭摺由驛馳陳伏乞

皇太后

皇上聖鑒訓示謹

奏

協守濰西添營籌勦摺

同治六年七月二十日

奏爲派軍協守濰西現經添募新營亟籌進勦並捻逆搶撲新河口隄牆經豫軍擊退各情形恭摺奏祈

聖鑒事竊

臣

於本月初五日已將捻逆撲犯膠防被官軍

擊退並籌辦直境梟匪情形馳報在案

臣

與提督劉銘傳

藩司潘鼎新等籌築膠萊河牆北起夏店南至柳林口牆

工業經完整值南路水勢消落柳林以下又添出崔家渡

二十里急應堵築

臣

已勻撥四營一律築牆扼守漸可竣

工迭經總兵宋慶督帶豫軍六千人於初二日馳抵新河

口當卽協同銘軍在該處堵紮總兵王永勝督帶開字營

於初十日到膠

臣

卽騰出常武十營汛地讓開軍接守於

十二日換防卽飭道員王成謙督帶常武營前往濰西填紮空虛之處查此路初無防軍經臣前次酌派東治四營會同鼎軍兩營築牆堵禦南起夏店北至辛安莊計四十里因兵力過薄特派常武十營前往擬抽回東治四營令其先行渡河以備勦擊之用王成謙於十六日到防後卽將常武八營接東治營所守三十里汛地自辛安莊北至下營六里尤爲淺狹卽派兩營趕築河牆一律設守據王成謙確勘地勢因水勢消落與潘鼎新初次履勘之時情形較異自下營至海口尙有四十餘里其小蛇廟魚里鋪兩處水勢最淺已留東治四營暫緩南來卽令就近布紮恐兵力仍薄臣復咨調青州駐防兵八百名到彼處協

守惟竭力布置仍屬暫顧目前之計以後恐水勢日落下營至海口四十餘里須俟李鴻章調軍趕到仍應通築長牆方爲周密昨接總兵宋慶來函十六日寅刻該逆撲犯新河口隄牆經該總兵督飭營官千總程允和力堵擊斃悍賊四五百名該逆仍致死猛撲適遊擊蔣尙鈞帶親兵三百人趕至奮勇直上各將士勇氣彌厲施放槍礮不絕該逆紛紛敗退復經該軍過河追剿斃賊極多奪獲騾馬四五百匹器械包裹無算復生擒老賊趙深王羅等三十餘名訊明正法頃據探報該逆向北奔突距下營等處僅三四十里深恐乘虛搶渡殊深焦灼迭接李鴻章來函約於月內可以啟程並擬酌帶萬人東來再抽運防各軍陸

續進勦

臣

以河東圩寨急須援救且秋收在邇亦須有兵

前進民間始敢刈穫

臣

兵三十一營現在南北分顧萬不

敷用是以暫令各營共添募步隊九營馬勇五百名擬抽

出防軍四五千入令已革總兵王心安統帶過河躡賊覓

戰以顧城寨兼助百姓秋收其抽出防軍地段卽令新營

補紮詎北路喫緊該革鎮四營不果南來

臣

現擬飭東治

營遊擊張勝全馳往濰西暫統北路所留四營仍飭該革

鎮趕卽回膠俟新營到齊卽酌抽八營先令督帶進勦該

革鎮尙知愧奮前在平度卽墨迭以數十騎衝入賊隊連

次接仗尙爲得力今擬令其孤軍先進亟慰民望實屬勢

不容已餘俟運河防軍來膠換防

臣

再酌抽萬人協同進

勦至直境梟匪聞已竄至霸永一帶逼近京畿必須亟爲撲滅臣每一念及心急如焚不敢以距東較遠稍形玩忽現飭東昌府知府龔易圖嚴防本境勾結但冀直兵擊賊南竄卽派所紮臨館各處兵勇會合直軍極力痛勦以期消寇患而固地方合併聲明所有派軍協守濰西現在募營籌勦並豫軍擊退捻匪各情形理合恭摺由驛具奏伏乞

皇太后

皇上聖鑒訓示謹

奏

擊散江境土匪力籌會勦片

同治六年七月二十日

再東省蘭刻與江南邳宿接壤素爲幅匪出沒之區近年督飭該地方官嚴密搜捕長川巡緝漸稱安謐前據郟城縣知縣李漢稟稱探聞江省邳宿地方有漏匪高歸劉兆燦等分糾夥黨在於嵇灣堰頭成子岡等處嘯聚滋事而沐陽高塘溝陰平等處亦有土匪竊起當經批飭該縣督率團勇實力防範並移咨江省督撫飭屬勦辦一面飛飭沂州府長賡帶勇馳赴邳宿交界地方會同堵緝迭據該府稟報六月十八日夜間有邳境高板橋漏匪高歸又名高幘仔劉兆燦股匪三百餘人假扮逃難鄉民逸入蘭山邊境詎踞張家民圩焚掠該府聞信後卽會同沂州營都

司官錦堂親督兵勇於二十二日馳往勦辦該匪聞風卽於是夜乘雨棄圩逃竄該府等跟蹤追擊於二十三日追及於蘭境之郭里村西北黃山卽督飭兵勇上前迎擊殺賊二十餘人該匪四路敗竄因連日大雨道路泥淖不便窮追二十九日該府等又逼之於蘭境之青山套該處舊有避難村民在山頂修築圩寨石牆繚繞該匪避逼逸入其中負隅死拒該府等奮力仰攻斃賊多名各兵勇乘勢搶入山寨擊斃悍匪四十餘人生擒王四劉先禮二名卽行正法奪獲擡礮十五尊旗幟槍械數十件救出被擄男婦數十口該匪棄馬擲械爬山逃遁餘匪竄走邳境之董家堂石埠等處除傷斃逃散外僅贖五六十人並無槍械

詎該匪竄回邳境後旋又句踞芝麻灘民圩經江省派出
參將張保聖遊擊陳書廷等督率馬隊追及圍攻該府等
聞信後亦卽帶隊飛馳前往該匪復棄圩南遁七月初六
日該府派弁探至合溝地方聞張保聖是日在白馬河與
匪接仗適遊擊陳書廷馳赴近村調團協助由小河繞路
突遇賊伏陣亡該匪竄抵邳境之堰頭一帶現在安徽撫
臣英翰已派提督黃秉鈞參將牛師韓等酌帶馬步三千
人馳赴邳宿會勦該府長賡督帶勇隊分布郟城所屬重
坊西南一帶以便會合相機堵擊查此股土匪屢經斬殺
勢極窮蹙惟沂屬與江境毗連各州縣向多伏莽深恐煽
惑蔓延必須早日殄滅方保無虞臣以勦辦任賴股匪正

在喫緊兵力難分已嚴飭知府長賡督募舊設勇丁並飭
鄰近各縣會同江皖各兵一體相機認真兜擊務期早爲
撲滅以靖地方所有竄擾蘭境土匪迭經官軍擊敗仍復
回竄江省現仍會勦各情形理合附片具奏伏乞

聖鑒謹

奏